

Hai Lingh Aencueng Ndawsim

打开另一扇心窗

Youq haemq nanz gaxgonq, youq ndaw singzlaux Bangzbei Yidali, miz dah lwgnyez he heuh Lidiyaj youq gizde youq. Dah de maj ndaej gig dwggaez, hoeng, boihseiz haenx dwg, de daj iq song aen da couh fangz lo, mbouj miz banhfaap yawj ndaej raen aen seiqgyaiq gyaundeiz neix. Mbouj-gvaq, de soqlaiz mbouj aenvih swheij dafangz ienq mbwn ienq vunz, dauq dwg bae daengz gizlawz couh dawz angqyangz daiq daengz gizde. De cungj dwg naeuz: “Bohmbwn dwg goengbingz hane, de hawj gou sengmingh, haengjdingh hix hawj gou angqyangz caeuq bouxwnq doengzyiengh lai.”

Lidiyaj mbouj gauq bouxwnq bang de, cix lumj bouxwnq ityiengh gag ra gwn, gag ciengx bonjfaenh, de

baengh gai va daeuj ciengx swheij, de cungj gag roxnyinh ndaw ciuhvunz swheij haengjdingh fatseng gijmaz saeh gig daegbied, ndigah de doiq daengzcog gig siengjmuengh.

Aensingz Lidiyaj youq haenx dep goengqbya Veizsuhvej Hojsanh. Veizsuhvej Hojsanh hawj namh dangdieg bienq biz, hawj vunz dangdieg ndaem gij doenghgo ndaej daengz demsou.

Hoeng gyoengqvunz ndaw singz Bangzbei cix mbouj siengj daengz, Byaveizsuhvej Hojsanj cawzle hawj vunz doxgaiq gig lai, lij hawj vunz daiq daeuj cainanh.

Miz bi ndeu, Byaveizsuhvej Hojsanh sawqmwh byoq feiz lo. Yaepyet, daengx aensingz cungj laepraurau. Gyoengqvunz sim vueng fwngz luenh, saemxsam saxsax, gaenbonj deuz

mbouj okbae, lumj doek roengz ndaw lajyaem bae nei. “Daihgya gaej vueng, cungj riengz gou byaij!” Youq ndaw laeprau sawqmwh cienz daeuj sing dahsau Lidiyaj dafangz haenx.

Laxlawz, Lidiyaj yienznaeuz yawj mbouj raen, hoeng, doengh bi neix daeuj, de byaij hongh gvaq gai gai va, doiq gij loh ndaw singz cungj sugsed lo. Seizde, de baengh daemj caeuq dingq couh ra ndaej loh deuz okbae, lij roxnyinh daengz gizlawz ceiq ancienz dem.

Doeklaeng Lidiyaj daiq daihgya deuz ok aensingz dwglau neix bae lo.

Aen goj neix lwnh raeuz: Miz seiz saetbae hix dwg cungj ndaejdaengz he. Dafangz doiq Lidiyaj daeuj gangj, yienznaeuz boihseiz, hoeng doeklaeng cix dwg de gouq le mingh daihgya.



Ndigah, dang raeuz bungzdaengz daemjdengj caeuq hojnanz seiz, yaek giengienz di. Aeu roxdaengz bohmbwn doiq mwngz gven hwnj aen cueng he seiz, doengzseiz hix vih mwngz hai lingh aen cueng, hawj mwngz doengzyiengh yiengjsouh gij angqyangz ciuhvunz mwngz!



Bang Daxboh Gaiqien

帮爸爸戒烟

Daxboh citien baenz yinx, mboengqneix congghoz de youh in lo, gou caeuq daxmeh gig yousim. Citien haihcawq gig lai, gou caeuq daxmeh siengliengz bang daxboh gaiq ien.

Dou youq gwnz vangj ra le haujlai faenzcieng caeuq dozbienq gvendaengz citien mizhah haenx, yaenq okdaeuj hawj daxboh yawj. Daxboh naeuz: “Gou mbouj dwg mbouj siengj gaiq, hoeng citien baenz cibgeij bi lo, siengj gaiq saedcaih daiq nanz lo.” Yawjdaeuj daxboh rox citien miz haih, cujyau vwndiz dwg gaiq mbouj ndaej. Baenzlawz guh ne?

Ngoenzsinghiz, gou sijsaeq louzsim yawj daxboh, de byaij daengz yangzdaiz bae, haengjdingh youh bae citien lo. Gou laeglemx lwnh hawj daxmeh nyi, daxmeh baez nyuq bwnda, dawz aen cungqraemx guhcaemz gou daeuj, coux raemx rim le, yaemj din yaemj fwngz byaij daengz henz dou yangzdaiz bae, daj gehdou liuqcinj ci ien daxboh cit haenx, baez ngaue gae, raq raemx he daj ndaw cungq byoq ok, sikhaek rwed ndaep gij feiz ciien lo.

Daxboh nyuex gyauej yawjraen dou, de gangjriu naeuz: “Daxmeh mwngz caen dwg boux nyingzcungq lauxsouj ha, gingqyienz cungq he couh nyingz deng lo! Daxmeh naeuz: “Gou raen yangzdaiz hoenzfodfod, laihnaeuz feizcoemh lo, ndigah ganjip ndaep feiz ha!” Dou cungj nyaenx mbouj ndaej riuhaa lo. Daxboh doiq daxmeh naeuz: “Baezlaeng raen gou citien, mwngz couh yungh aen cungqraemx neix bang gou ndaep feizien bae, ceng' aeu caeux di gaiq ien bae.”

(sam nienzgaep Cwnz Liminz)

Duzmoed Caeuq Daekgaeuj

蚂蚁和蟋蟀

Youq Seizhah hwnghdat, gyoengq moed ciuqyiengh gaenxgyaek dwk guhhong, moix ngoenz mbwn ngamq rongh couh hwnqcong, nyaengq dwk guhhong mbouj dingz.

Daekgaeuj ne? Ngoenzngoenz “gitgit, gitgit” ciengqgo mbouj dingz, doeng youz sae langh, gwn ndei youq ndei gvaq saedceij.

Giz dieg lawz cungj miz doxgaiq gwn, gwnz bya ndaw doengh cingq hai gak saek gak yiengh va, caen dwg aen seizhah angqyangz he ha!

Daekgaeuj doiq duzmoed gaenxgyaek guhhong gamjdaengz gig geizheih. “Vei, vei, daegnuengx duzmoed, vihmaz baenzneix roengzrengz guhhong ne? Yietnaiq saek yaep, lumj gou yienghneix ciengqgo mbouj dwg gig ndei ha?”

Hoeng, duzmoed lij laebdaeb guhhong, mbouj yietnaiq saek yaep naeuz: “Youq seizhah rom gijgwn, cij ndaej youq seizdoeng nitgyaengj haenx gvaq ndaej ndei ha!” “Dou saedcaih

mbouj miz seizgan ciengqgo guhcaemz lo!”

Daekgaeuj dingq duzmoed yienghneix gangj, couh mbouj caiq swt duzmoed lo. “Caen huk ha, guhmaz siengj gij saeh baenzneix nanz baezlaeng ne!”

Seizhah angqyangz gvaqbae lo, seizcou hix gvaqbae lo, seizdoeng daeujdaengz lo, rumzbaek cihuhu, gwnzmbwn doek siet mbinfengfeng.

Daekgaeuj byom ndaej mbouj baenz yiengh lo, gizziz cungj dwg siet, di doxgaiq ndeu hix ra mbouj daengz.

“Gou danghnaeuz lumj duzmoed nei, youq seizhah rom gijgwn geijlai ndei ha!”

Daekgaeuj dayawj couh yaek laemx roengz lo, de saemxsax byaij youq gwnz diegsiet.

Duzmoed itcig gaenx guhhong haenx, seizdoeng daeujdaengz le hix mbouj lau. Gyoengqde rom miz haujlai doxgaiq, lij caep aen ranz raeujrub he.

Dang daekgaeuj ra raen ranz duzmoed seiz, gyoengq moed cingq angqyangz gwn doxgaiq ne!

“Daegnuengx duzmoed, hawj gou gwn di doxgaiq ndaej lwi? Gou iek yaek dai lo!”

Gyoengq moed doeksaet yat. “Yi! Mwngz mbouj dwg daeggo daekgaeuj youq seizhah raen gvaq haenx ha? Mwh seizhah mwngz ngoenzngoenz ciengqgo, dou laihnaeuz mwngz daengz seizdoeng le lij diuqfoux bw! Daeuj gwn di doxgaiq ba, caj ndangdae cangq le, caiq ciengqgo ndei dingq hawj dou dingq!”

Goj iq dauhleix hung: Guh saehcingz raeuz yaek siengj gyaed di, mbouj ndaej cij yawjraen dangqnaj.

